

懷岷精舍金石跋尾

懷

岷

精

舍

金

石

跋

尾

丁卯二月章鉅題首

懷岷精舍金石跋尾

烏程 李 宗蓮

魏崔敬邕墓誌銘跋

崔敬邕魏書附崔挺傳蓋亦挺之從祖弟也挺從祖弟脩和列於誌前與宋劉襲志同誌云祖秀才殊字敬異夫人從事中郎趙國李休女父雙護中書侍郎又云夫人中書趙國李詵女殊與雙護名位不見史休即休之別體李休附北史李士謙傳云字紹則續次子詵魏書附李順傳云靈族叔字令孫官京兆太守蓋即其人也誌稱敬邕起家爲司徒府主簿轉尙書都官郎中爲東朝步兵景明初丁母憂及其餘官位皆與史合惟爲都官時兼吏部郎則史所不著誌云臨青男史作臨淄男誌云營州刺史史作管州臨青即臨清地形志司州陽平郡臨清縣營之爲管以字形相近而譌又誌稱延昌四年徵爲征虜將軍大中大夫方授美任而君嬰疾連歲以熙平二年十一月卒於位史誤以卒之歲爲授征虜之歲而云神龜中卒又史稱諡曰

恭誌云加諡曰貞皆當以誌爲正誌云孤息伯茂史稱子子盛襲爵除奉朝請伯茂即子盛六朝時名與字往往互見

定州刺史文靜李公墓誌跋

按李憲魏書有傳誌有云大父太尉宣公即順也史稱皇興初順子敷等貴顯追贈侍中太尉公高平王諡曰宣云考安南使君按史憲之父爲式歷散騎常侍平東將軍西兗州刺史不言其爲安南蓋贈官也誌云屬養禮云及乃除建威將軍趙郡內史史稱以母老乞歸養拜趙郡太守惟除建威及徵爲大將軍長史復徵爲太子中庶子史皆從略史於守河南尹之前爲定州大中正而誌不著云萋菲內構癥疵外成反顧三河龍門日遠即黨附高肇爲御史所劾除名事及槃水鰲纓自拘司敗與史所稱憲旣歸國付廷尉會憲女壻安樂王鑒據相州反遂賜憲死皆合銘後另書妻息閔閱有云夫人河間邢氏父肅州主簿按憲之母亦邢氏獻文時追贈孝妃則憲妻或其姪肅名位甚微於史無徵又云長子希遠字景冲州主簿少喪按史稱希遠早卒惟不言其爲州主簿又云子長鈞字孝友開府參軍按

史稱希遠兄長鈞興和中梁州驃騎府長史憲傳蕭衍來寇壽陽憲遣子長鈞率衆逆戰軍敗長鈞見執碑書長鈞次於希遠史稱長鈞爲希遠兄則長鈞乃憲之庶長子開府參軍當爲戰沒後所贈官也又云第二子希宗字景玄散騎常侍中軍大將軍出後下缺二字史云出後憲兄憲之兄史無考惜碑亦泐其名北史齊文宣納其第二女爲皇后位上黨太守則入齊後所歷官也又云第三子希仁字景山輔國將軍中書侍郎魏書稱希仁武定末國子祭酒兼給事黃門侍郎北史謂希仁卒于侍中太子詹事皆最後所歷之官又云第四子騫字景讓散騎常侍中軍將軍殷州大中正按與魏書合北史騫字希義終黃門侍郎又云第五子希禮字景節征虜將軍司空諮議修起居注魏書惟云武定末通直散騎常侍而已北史希禮起家著作佐郎與邢邵等議定禮律卒於信州刺史又云長女長輝適龍驤將軍營州刺史安平男博陵崔仲哲父秉司徒靜穆公與此合仲哲假寧朔將軍賜爵安平男不言其爲龍驤與營州仲哲與都督元譚赴援戰死或贈官史略之太平廣記引三國典略齊崔子武

幼時宿于外祖楊州刺史趙郡李憲家則子武或即仲哲子也
 又云第二女仲儀適冀州司馬渤海高□□□侍御史按憲
 以附高肇被禍此必肇之子姓故并其父名亦鑿之又云第三
 女叔婉適兗州刺史漁陽縣開國男博陵崔巨父逸廷尉卿按
 崔逸魏書附崔辯傳官廷尉少卿卒贈以本官據碑則當贈卿
 非少卿巨史作巨綸官爵與誌合又云第四女季嬪適司空安
 樂王□□□詮尙書左僕射武康王按史鑒據相州反賜憲
 死鑒傳莊帝初特復鑒王爵贈司空北史安樂厲王子詮除侍
 中尙書左僕射薨諡曰武康子鑒襲除相州刺史北討大都督
 討葛榮鑒既庸才見天下多事遂謀反降附葛榮爲裴衍源子
 邕斬鑒首傳洛鑒勑其名有所諱也又云第五女稚媛適驃騎
 將軍左光祿大夫滎陽鄭道邕父瓊青州刺史按瓊魏書附□
 □傳爲范陽太守卒贈太常少卿孝昌中弟儼寵要重贈青州
 刺史子道邕歿關西驃騎之官左光祿之位皆可補史之闕又
 云希遠妻廣平宋氏父弁吏部尙書孫祖牧字翁伯太尉外兵
 參軍按宋弁傳高祖遺詔以弁爲吏部尙書而弁已先卒與誌

合史稱希遠子祖悽襲祖爵今誌作祖牧與祖悽當非一人史據其最後之人而言疑祖悽爲牧之弟或祖牧亦早喪也又云長鈞妻河南元氏父孟和司空公下缺四字孫譚亮開府參軍事第二孫譚德第三孫摩訶第四孫毗羅孫女迎男按元孟和不見於史同時有廣川王略子諧字仲和又咸陽王禧子通字曇和翼字仲和或當爲昆弟行也又云希宗妻博陵崔氏父楷儀同三司孫祖昇字孝舉司徒參軍事第二孫祖勳字孝謀孫女祖猗適安樂□□□按崔楷附崔辯傳與憲同以黨附高肇爲中尉所劾卒贈儀同三司與誌合祖昇祖勳北齊書外戚有傳史稱齊獻武王爲文宣納希宗第二女爲妃齊書文宣皇后傳名祖娥趙郡李希宗女而誌並不書蓋誌作于元象元年距文宣之立先二十三年其時文宣后或未生也祖猗適安樂下有缺必即安樂王鑒之子又云希仁妻博陵崔氏父孝芬儀同三司孫伽利第二孫黃父按魏書崔芬字恭梓太昌初除車騎將軍加儀同三司與誌合又云騫妻范陽盧氏父文翼開府諮議孫女寶信按北史盧玄傳昶子文翼字仲祐以軍功爵范陽子位

大中大夫開府諮議與文苻之正員郎皆初歷官也考孝貞傳
騫女爲安德王延宗妃疑寶信卽是又云希禮妻范陽盧氏父
文苻正員郎孫僧藏按文苻文翼之弟字叔偉位通直散騎侍
郎北史希禮子有孝貞孝基孝俊孝威皆附傳則僧藏當爲孝
貞小字餘或時未生也又云祖牧息白石僧德女阿範蓋無考
矣

高湛墓誌銘跋

錢竹汀宮詹跋是誌謂魏書地形志有荊州有北荊州無所謂
南荊州者王述庵司寇跋是誌謂洛州舊有荊州之稱當時目
洛州爲南荊州亦未可知愚按南史紀大通二年魏大亂北青
州刺史元儁南荊州刺史李志以其地降是魏有南荊州也隋
書地理志春陵郡後魏置南荊州太平寰宇記棗陽縣本漢蔡
陽縣地後魏于此置南荊州隋大業初改置春陵郡至北荊州
卽河南郡陸渾縣東魏所置東荊州在唐州太和中置魏書李
愍太昌初除大府卿出爲南荊州刺史轉東荊州是也碑云僞
賊陳慶率旅攻圍孤城獨守云云按侯景傳有陳慶爲景僞儀

同與呂季略爲景爪牙然其時景未叛當非其人南史夏侯亶傳普通七年武帝遣北道軍元樹帥彭寶孫陳慶等進師合肥時距天平初僅七八年或即此人又魏書天平二年蕭衍司州刺史陳慶之寇豫州陳慶之史有傳與此誌情事頗合惟名作慶之耳誌有云假龍驤將軍行襄城郡事又云除大都督行廣州事按之史天平三年二月東魏攻克南汾潁豫廣四州卽是時事魏書地形志廣州徙治襄城是湛之行襄城郡行廣州實未嘗過雷池一步也錢宮詹疑爲高肇之子余初疑爲高翼之孫高昂之子然湛與昂並卒于元象元年年皆四十餘故不合

北齊趙郡王高叡修寺建塔碑跋

按碑在直隸靈壽祁林山其曰使持節都督定幽安平東燕滄瀛諸軍事撫軍將軍儀同三司定州刺史六州大都督趙郡王叡北齊書叡本傳天保二年出爲撫軍將軍六州大都督三年加儀同三司七年以本官都督滄瀛幽安平東燕六州諸軍事八年徵赴鄴皆合曰先公佐世嘗歷斯蕃叡父趙郡王琛以永熙二年除使持節定州刺史見本傳曰皇弟分陝嘗爲斯牧彭

城王澈傳澈武定六年出爲滄州刺史轉定州太平寰宇記澈
爲定州刺史有善績人吏送別悲號滿路又馮翊王潤天保初
亦爲定州刺史碑後云大齊天保八年歲在丁丑□□□戊辰
十五日壬午刊記據文時□青祗陽值官杏則缺字當爲二月
朔然以長術考之是年二月爲庚午朔與此不合惟六月爲戊
辰朔或文成於春而碑刊於夏北史以是年二月爲癸酉朔尤
不合餘常山貞石志已詳不復贅

貞石志於丁丑下缺二字
今細閱碑拓實缺三字

周開府儀同賀屯公墓誌銘跋

誌云公諱植字永顯建昌郡人也其先侯姓按侯植周書有傳
云字仁幹其先上谷人高祖恕爲北地太守子孫家於三水按
建昌與北地同屬涼州誌有云戮河橋之封豕摧沙苑之長蛇
皆見於本傳誌稱歷位衛大將軍右光祿大夫太子中舍人河
陽郡守司倉大夫皆可以補史之闕史稱宇文護專擅植以憂
卒贈大將軍平川刺史諡曰節據誌卒贈光州刺史諡曰斌當
以誌爲正誌後列世子定遠次子定徽等六人皆以定爲行史
惟稱子定嗣脫遠字非誌存不復知有定遠矣金石之有功於

史如此誌多別字如華之爲莘節之爲萑封豕之爲封豕長蛇之爲萑蛇褰帷之爲褰惟遐福之作蝦福猶北魏習尙保定四年四月己丑朔與通鑑目錄合惟戊申當爲二十日誌云廿六日誤也

隋比邱尼釋脩梵石室誌銘跋

誌有云比邱尼諱脩梵俗姓張氏清河東武城人瀛州刺史烈之第三女按烈字徽仙魏書七十六有傳官鎮東將軍瀛州刺史與誌合誌又云有同縣崔居士南青使君之第五子以德義故歸焉考崔氏之拜南青州刺史者劼字彥立北齊書有傳子二人拱撫其贈南青州刺史有二一長謙附崔休傳一景徽附道固傳脩梵以隋開皇十三年卒年九十一當生於魏景明四年長謙被徵於天平於時略後疑景徽子爲近旣云終於俗宅又云兄弟相撫貫截心肝烏鳥之情終天莫報似脩梵有子特不著其名耳下云馮翊吉子才高學博請揆其詞則撰文者也惜僅署姓而隱其名南史如吉翰吉勣吉士瞻皆馮翊人北方無聞焉然云才高學博不免近於自誇矣

唐廟堂碑跋

孔子廟堂碑粹編據宋初王彥超重刊本載入其中缺二十餘字今以臨川李氏所藏舊搨本補之神下缺功字翦下缺商之業雖復五字電下缺以立二字鄉下缺黨栖遲洙泗不六字膺下缺五緯二字萃編誤空三格天下缺歷字懷寶寶字作古瑤字烝哉作蒸哉扶下缺興烈二字命下缺吹萬歸仁四字憬下缺彼字犁下不作顙字已泐無厥角二字作睭□兢懷下作夕惕馭朽四字廿九日作二十九日白下作模形二字珠庭作洙庭覃溪翁先生有跋旁行斜上考訂縝密

虞世南左武侯將軍龐某碑跋

出文館調林

此碑於諱字皆闕而不書予考之蓋龐卿惲也卿惲事蹟不詳於唐書但云并州人從討隱太子有功拜右驍衛將軍邾國公追改鄴國寥寥二十餘字惟唐會要歷書總章元年等級功臣有潭州都督龐卿惲神龍初給功臣家實封龐卿惲在二十五家之列建中元年定功臣第三等右驍衛將軍安化縣公龐卿惲安化之封與此碑合唐書裴寂傳武德九年功臣封戶龐卿

惲戶四百劉師立傳師立與尉遲敬德龐卿惲李孟嘗等九人
錄功拜左衛率遷左驍衛將軍襄武郡公此碑云九年六月以
業預艱難効彰忠欵蒙授左衛率其年七月詔授右驍衛將軍
九月改封安化郡開國公蓋與師立敬德同以討建成功遷秩
進封觀師立之封襄武郡公知此碑所云安化郡公者不誤會
要或當譌爲縣公也卿惲仕隋爲左翼衛授朝散大夫歸唐預
平國初諸僭竊授開府儀同大將軍上柱國封真定縣侯爲秦
王府左三翊衛車騎將軍秦王左一副護軍左內馬軍副總管
史皆闕書歐史僅以功不甚顯存姓氏於趙文恪等十八人之
列然則永興此碑在宋代已亡失抑篇中不署諱字遂不加審
考耶此碑於卒後但云贈人官諡人公考之其曾孫龐履溫清
德碑則知贈幽平燕易嬀嬀六州諸軍事幽州刺史諡曰肅此
碑云遺孤藐然不勝孺慕考之履溫碑則知子名同福官并州
大都督府司馬饒州刺史左衛將軍安北都護蓋卿惲卒時同
福尙幼又高麗傳載左金吾衛將軍龐同善破高麗大唐新語
載賈言忠對高宗語龐同善雖非鬪將持軍嚴整同善當亦同

福之昆弟也

故騎都尉濮陽令于君碑跋

碑云君諱孝顯曾祖提祖瑾魏書有傳父禮附于寔傳云義弟禮上將軍趙州刺史安平郡公與碑合云周武帝東伐以公爲大使總知兵馬節度預平齊之役可補史之缺孝顯隨起家右親衛煬帝時託病告歸高祖起兵仗劍投歟爲左武侯錄事參軍授元帥府鎧曹參軍破八關堡清城宮□太陽門陷陣先登勲第一授騎都尉按唐書王世充傳武德三年七月秦王率兵攻之師至新安世充鎮堡相次來降八月秦王陳兵於青城宮四年二月青城守將以宮降即是役也太陽門者東都城門即前盧楚謀殺世充將軍費曜等拒戰于東太陽門外即其地是孝顯預平世充授騎都尉貞觀初授濮陽令而卒于官舍其行事史皆略之通鑑目錄貞觀十四年十一月甲子朔碑云壬寅朔不合云十日戊子尤爲舛錯夫人李氏平昌縣主皇帝堂姑則爲神通神符叔良輩之女然不可定爲何人

左監門大將軍襄城郡公樊君碑銘跋

按樊興唐附書劉文靜傳語焉不詳史稱父犯罪配沒爲皇家
隸人碑則三代具著云高祖弼魏武陵太守曾祖叡魏員外散
騎常侍巴州刺史新淦縣開國侯祖文寔隨南陵太守父方皇
朝金紫光祿大夫慶善宮監興於唐義旗肇建授朝請大夫破
西河授通議大夫平霍邑加金紫光祿大夫尅定京城加左光
祿大夫除左監門郎將未幾以功次除左監門將軍破薛舉授
上柱國西華縣開國公賞物五百段平劉武周封襄城郡開國
公平王世充竇建德勳餘十二轉迴授其子賜物二千段金卅
斤武德五年與竇建德戰加勳八轉賜物千段奴婢牛馬平劉
黑闥賚物五百段六年破徐員朗賞物千段八年獯獫犯塞大
駭涇陽公摧鋒轉鬪羣凶折首給封四百戶授營國公貞觀六
年破陵州獠授左驍衛將軍坐公事削此貞觀六年以前興之
事蹟史皆略之惟云平京城累除左監門將軍從太宗破薛舉
平王世充竇建德累封營國公賜物二千段金三十錠尋坐事
削爵碑以削爵在授左驍衛將軍之後史則先坐事削爵而後
授驍衛皆當以碑爲正史又云從特進李靖擊吐谷渾爲赤水

道行軍總管坐遲留不赴士卒多死亡甲仗以勳減死此則碑所不著碑又云十一年還除右監門將軍十五年扈從巡方檢校左驍衛大將軍領千騎十八年授雲麾將軍守左監門大將軍封襄城郡開國公食邑二千戶蓋營國之封前已削至是復封襄城史惟稱久之累拜左監門大將軍封襄城郡公碑又云十九年鑾輿東指龔行遼隧定州還朝副梁國公宮城留守賜物三百段檢校右武侯大將軍史亦稱太宗征遼副房元齡留守京師俄又檢校右武侯大將軍碑又云廿二年從幸玉華宮因留守廿三年除左監門大將軍則史所不書碑又云永徽元年四月卒贈左武衛大將軍洪州都督江饒吉處鄂虔撫八州諸軍事使持節洪州刺史陪葬獻陵諡曰思公史稱贈左武侯大將軍不書諡亦當以碑爲正長子護軍濮王府兵曹參軍修義世子上騎都尉荊王府法曹參軍修武史亦無名蓋五代亂離此等碑版亦復缺失景文存舊史之文不復訂正藉非貞石尙存不幾湮沒哉

蜀王故西閣祭酒蕭公墓誌跋

誌云公諱勝字元寂梁中宗宣皇帝之孫太尉安平王周柱國
巖之第十三子也按周書蕭譽傳巖字義遠譽第五子歷侍中
荊州刺史尚書令太尉太傅入陳授平東將軍東楊州刺史陳
亡百姓推巖爲主爲總管字文述所破死隋文本紀開皇元年
五月丁未梁主使其太宰蕭巖來賀七年八月庚申梁主蕭琮
來朝九月乙酉梁安平王蕭巖掠於其國以奔陳外戚傳琮來
朝遣武鄉公崔弘度將兵戍之軍至都州琮叔父巖及弟瓚等
懼弘度掩襲遂引陳人至城下虜居民而叛所歷官太尉安平
王均與史合惟周柱國不見于史誌又云爰自綺年已膺茅社
封爲宜陽侯勝之名不見于周隋諸史宜陽之封猶是後梁時
也故其下云俄而青蓋云歸云云誌又云隨授散騎郎皇朝爲
上輕車都尉蜀王西閤祭酒按諸史高祖兄次曰湛武德初追
封蜀王職官志王府官屬有東西閤祭酒各一人從七品上史
謂湛封蜀王爲追封則湛當歿於唐氏建國之先不應建置官
屬恐武德初湛猶未沒然本紀高祖受禪即封湛子博父爲隴
西王則湛已前沒可知宰相世系表齊梁房巖安平王下缺四